



UNIVERSITÄTS-
BIBLIOTHEK
PADERBORN

Universitätsbibliothek Paderborn

Parallela Geographiae Veteris Et Novae

Briet, Philippe

Parisiis, 1648

§. 1. In Armorica.

urn:nbn:de:hbz:466:1-13147

CAPVT XII.

*De mirabilibus Gallia locis.**In Armorica.*

IN Episcopatu Corisopitensi ad Vicum *Concarneau*, in die festo augustissimi Sacramenti, habetur supplicatio semper circa horam decimam. Illa per æstuarium traducitur, eique cedit æstus maris; si tum intumuerit, sensim detumescit, viamque Christi Corpus sequentibus facit: neque vnquam dilata supplicatio, licet cum primùm ex basilicâ egrederetur mare intumesceret. *Acta publica iussu Episcopi confecta.*

In Insulâ proxima ciuitati Veneticæ stagnum erat satis amplum piscibusque refertum, quod aliquando versum est in cruorem ad altitudinem vlnæ. *Gregor. Turonensis lib. 8. cap. 5.*

In Britannia Armorica fons visitur, ex quo si aquam hauseris in cornu bubulo, & petram fonti vicinam perfuderis, tempore quam tumlibet sereno tempestatem non effugies, sed propè madidus domum reuerteris. *Ioannes Eusebius Nierembergins.*

In orâ Aremorica ad carinas nauium crescunt volucres informes primò, deinde sensim formantur, rostro in lignum defixo; vbi moueri incipiunt sensim reuelluntur, & mare petunt anatibus similes, indigenæ vocant eas *des Crabanz*, seu *des Brenaches*. *Argentraus lib. 1. Hist. Armoric. cap. 18.*

Monfortij in suburbio, S. Nicolai Basilica est, in quam quotannis Anas antea minimè cicur cum pullis suis venit in festo huius Sancti nihil timens, sed eodem gradu deambulans, multis hominum millibus ad hoc spectaculum defixis, viamque quâ pergit Anas, vtrinque stringentibus. Mox cum pullis ad stagnum redit, nec deinceps visitur. Contingit istud & hoc tempore, sed non quotannis. Multa quoque alia circumferuntur de hac historiâ, sed non certa, vt quod vnum ex pullis semper relinquat, quod circa crucifixum volitet, &c. *Baptista Fulgosus. Chassanaus, Argentraus lib. 1. cap. 19. citans acta huius Ecclesie, & testes etiam Calvinistas.*